

## ARLeF: ai 26 di Setembar, la Zornade Europeane des Lenghis

*Un spazi divulgatîf al sarà organizât a Udin, in vie Lionello*

Promovi la diversitât culturâl e linguistiche, incoragjâ lis personis di dutis lis etâts a imparâ lis lenghis - stant che fevelânt plui di une al facilite lis relacions e al jude a cjatâ lavôr e a fâ cressi lis impresis -, sensibilizâ ae grande varietât di lenghis in Europe. E je cheste une part dai obietîfs de **Zornade europeane des lenghis**: “Unîts inte diversitât”. Une ricorence istituide dal Consei di Europe che, dal 2001, si ten ogni an ai 26 di Setembar par celebrâ la diversitât linguistiche dal Vieri Continent dulà che plui di 50 millions di personis a fevelin plui o mancun 60 lenghis minoritariis (lis trê lenghis di minorance de nestre region – furlan, sloven e todesc - a fasin part di chest grup). Une iniziative che nol podeve no aderî la ARLeF (Agenzie Regjonâl pe Lenghe Furlane) organizant **un moment di divulgazion, a Udin, miercus ai 26 di Setembar (des 10.00 aes 18.00), devant dal Palaç comunâl, in vie Lionello**, cuntun stand e cu la presince di voluntaris che a distribuiran, a gratis, materiâl informatîf e gadgets.

I obietîfs gjenerâi de Zornade a son chei di informâ il public plui larc su la impuartance dal plurilinguism; di promovi, tutelâ e favorî lis diversitâts linguistiche e, infin, di incoragjâ lis personis a imparâ plui lenghis dilunc de vite, a cualsisedi etât e par cualsisedi reson. Imparâ lis lenghis di altris popui nus jude a capî miôr lis variis culturis e a superâ lis diferencis. Il Consei di Europe si augure che cheste Zornade e vegni celebrade a ducj i nivei: dai citadins singui, ma ancje dal mont de scuele, de comunicazion e de politiche.

La acuisizion des competencis linguistiche, inte atualitât, a son une dibisugne comune e un dirit universâl. Par plui informazions su la Zornade, su dutis lis iniziativa organizadis in Europe e par scjariâ materiâi didactics e informatîfs, si pues navigâ intal sît [www.coe.int/edl](http://www.coe.int/edl).

*Udin, ai 20 di Setembar dal 2018*

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<